

Hylli i Dritës

Ubi Spiritus Domini, ibi libertas.

(II. ad Cor. III. 17).

1. Festa e Bajrakut	Fq. 213
2. Váj për Kosovën e për kosovarët e ikun!	„ 217
3. Per historín kombëtare	„ 222
4. Halili i qet Bejleg Mujit (<i>rapsodí</i>)	„ 225
5. Murana...	„ 233
6. Rregullim i çmimit të drithnavet	„ 236
7. Nje veshtrim mbi poezine	„ 240
8. Lojë të komtare	„ 245
9. Gjërmime...	„ 250
10. Lajme rrokull Shqypnis	„ 253
11. Rreth botës	„ 256



*Drejtimi man tagrin m' çdo artikull, q' botohet në këtë
Perkohshme, tue ndalue njëherit edhe çdo rishtypje a perktim.*

Festa e Bajrakut

Mârr t' a kundroj sá mâ per s' afermi jeten e Maleve t'ona, e, kahë anë e m' anë e pershkoj shpirtin shqyptár, qi endë e gjallnon zakonet e Lekve, me bindje të kandshme ndalem edhe i vë shêj nji punës: Festës së Bajrakut nuk i a gjêjë kund rasen shoqe me të cillen t' a krahasoj: ajo âsht dita e motmotit, kur në daç vehtjet si vehtje, në daç familjet si familje, a por edhe Bajraku, më nji, si Bajrak, botnisht faqe gjithkuej duen t' a diftojn sá pernjimend besojn e der kû u mrrijn burrnija, bujarija e ndera shqyptare.

Në ket pikpamje e per ket qellim, at ditë, âsht nji garë e vertetë, por garë fisnike madhniye shpirtnore, e cilla as grimë nuk shtypë, por mâ teper sgjon e ushqen mâ të naltat ndisë të virtyteve shoqnore.

At ditë, jeta fetare e jeta shoqnore e malcorit shqyptár, si dy lule motra, shperthye më nji pip, perkueshem, tfaqen në mâ të madhin shkelzim: n' asnji rangë nuk ké me e pá Malcorin mâ të dhânun qi të dahet me nderë... kurrkund nuk ké me e gjetë mâ t' afruem e të vllaznuem me miq e me të huej, sa per festë të Bajrakut.

Po dihet, se sod, Festa e Bajrakut nuk lutet mâ si dikuer: nuk ká mâ log as batare, nuk gjuheth sheji as nuk ká me se i thrret miku të zott të shpís; djelmt e maleve nuk kan si ngucen mâ ashtû vllaznisht tue shtí pushkë e batare si motit; shum zakone të vjetra janë lanë e po harrohen, por me gjith kta, në shpirtin e popullit t' onë vonë kan m'u shrrajosë besë e fé, nderë e burrní, karakteristikat e trashigueme prej të parve.

Festa e Shë Markut, ashtû si çë lutet në Katund e në Bajzë të Kastratit, âsht me të vertetë nji festë typike shqyptare. Me 25 Prill, nder kto dy famullí, të cillat perbajn Bajrakun e Kastratit, ké muejtë me pá e me preké me dorë shka malcori e malcorja kan ruejtë e kan ternue në jeten shqyptare: se si priten e si qiten miqt verte e shqyptarisht; se sá me nierzí aq edhe me dashtní vllaznore: per zemer e bujarí mandëj, se si s'u lanë

